

L'avegnir tut sut in tetg

Cuira: Nov center d'innovaziun

DA GION NUTEGN STGIER / ANR

■ **Ina grupp da persunas privatas è l'inizianta dal project «InnoQube» che duai daventar in center d'innovaziun in pau spezial. Lavurar, mover e viver, tut quai duai esser sut in tetg. Als iniziants èsi reussi da persvader pliras firmas internaziunalas da sa chasar en lur bajetg. Il mars da quest onn aveva la «InnoQube SA» preschentà l'idea dal center d'innovaziun al Rossboden a Cuira. Usa daventa quel adina pli concret. Quai han ils iniziants testifigà ier cun pre-**

schentar ils detagls dal project che custa 30 milliuns francs. *Franco Quinter*, il president dal cussegl d'administraziun da la societad acziunara, ha ditg che la finanziaziun dal «InnoQube» saja garantida. Proximamain vegnia inoltrada la dumonda da construcziun a la citad da Cuira. Quella saja fin ussa stada fitg averta ed er fitg cooperativa per quel project, ha punctuà *Quinter*. La citad da Cuira è er quella che metta a disposiziun il terren en dretg da construcziun. Realisà vegn il center d'innovaziun en vischinanza dal bajetg da la Somedia SA. Per Cuira saja

la realisaziun da quel project da gronda valur economica e culturala, ha ditg *Urs Marti*, il president da la citad.

Ferms partenaris

Il «InnoQube» na saja betg mo in center nua ch'i vegnia lavurà, ha ditg *Quinter*. Innovaziun, collavuraziun, cooperaziun, barats, ideas e perscrutaziun stettian en il center da tut ils partenaris che vegnian a sa chasar en quel bajetg, ha menziunà *Quinter*. I vegnia betg mo lavurà, mabain er vivi e procurà per bler moviment en quel center d'innovaziun. Ils iniziants

principals èn cunzunt er sa mussads cun-tents d'avair chattà cun la citad da Cuira, cun *Wirth ITendis SA*, *Invias Zindel Uf-fer* ed autras firmas da renum partenaris serius. *Quinter* ha ditg che da quel cen-ter d'innovaziun na profiteschia betg mo Cuira, mabain l'entir Grischun ed er la Svizra. En quel bajetg duaian fin 300 persunas chattar lavur, accentuescha *Quinter*. Sche tut va tenor plan duai da prima-vaira 2019 succeder l'emprima badiglia-da. L'avertura dal center d'innovaziun duai esser la stad 2020.

La «piazza d'economia»

sco object da parada

Il bajetg ha ina larghezza da 75 meters ed in'atezza da 15 meters. Construi vegn l'object per gronda part da lain (Quadrins). Dasper il plaunterra ha il center d'innovaziun trais auzadas transiblas. Intern ha il bajetg ina furma d'in teater grec cun la «piazza d'economia» sco object da parada. Quella duai star a disposiziun per occurrenzas economicas, culturalas, referats e lura er radunanzas. Il tetg, quel è da cumparegliar cun in'umbrella, ha ditg l'architect *Valentin Bearth*.

Ina personalitad da l'architettura

Realisà vegn il center d'innovaziun tenor il plan da *Bearth*. L'um da Casti tutga en l'architettura naziunala ed internaziunala tar ina da las grondas personalitads. Tenor sia idea èn gia vegnids realisads gronds ed enconuschents bajetgs. *Bearth* ha er instrui sco professur intgins onns ed er manà la scola d'architettura a Mendrisio. Sa participads a la concorrenza d'architettura per il center d'innovaziun eran quatter biros d'architettura. Persvas ils iniziants il pli fitg ha lura il model dal biro d'architettura *Bearth & Deplazes*



Ina visualisaziun da project «InnoQube».

MAD